

# Jut

## Nəgkiariien sə rani mə nəfe i nəkukuə

Jut rəmwhen ia Jemes, in piəvi Iesu. In rīrai nəkukuə i mægkiari ia nahatən eikuə me səməme Pita ramægkiari ia nirəha ia nəkukuə səvənhi sə ro kəru irə. Jut in mwī rīni mə nakalasia me tuhaməkeikei mhəsiari kamo nahatən eikuə me nəha həkoui irapw irəha ia suatuk atukwatukw. Nahatən eikuə me nəha haməni mə Iesu rīpko mhə in Tīni Kumwesən. Irəha kamhəiri pen nərmama ia noien ərəha. Jut rīni mə Kumwesən trərpwīn noien ərəha səvəi nahatən eikuə me mouraha irəha. Rəmwhen in rīnərpwīn raka noien ərəha səvəi nagelo ərəha me mīne nərmama ərəha me ia nəpīn səvəi Oltestamen.

### *Nəgkiariien sə rakupwən*

<sup>1</sup> Iou Jut. Iou iərmama riti sə iakamo tukwini nari m Iesu Kristo. Piak nə Jemes. Iakamrai nəkukuə i rauvehe tukumiaha nərmama me i Tata Kumwesən rīnokeikei kīmiaha, məkwein ia kīmiaha. Iesu Kristo in ramətui amasan tukumiaha.

<sup>2</sup> Pwəh Kumwesən trəriari pehe napiien, nəmərīnuien, mīne nokeikeiien m kīmiaha. Pwəh irəhar harasori mwī tukumiaha.

*Nəkur ərəha me mīne nərpwīnien sə Kumwesən  
tro mīnraha*

<sup>3</sup> Piak keikei me. Fwe kupwən iakokeikei pik mə takrai nəkukuə i m kımiaha, mægkiari ia suatuk səkitaha pəri Kumwesən rauvehimiru kitaha irə. Mətə təkwtəkwuni iakregi mə takaməkeikei mirai nəgkiariien i, mini pehe tukumiaha mə tihaməkeikei mhousari mhəkwətəmhiri əknekın nəgkiariien i kitaha samahatətə irə. In i nəgkiariien pərhiən sə Kumwesən rıməuvei pen m nərmama me səvənhi, nənə trıpkuvei pen mhə mwi ia nəpın riti mwi.

<sup>4</sup> Iakani iamınhi irə ti nəri nə mə nərmama nepwın həuvəuvehe afafa raka ia nousəsımwiniən səkımiaha. Irəha nəkur ərəha me. Kamhəkoui namasanien i Kumwesən rauvehimiru kitaha irə ruvehe mo nari riti sə raməsəni irəha həukurən noien nəfe nəghin nətəriğien ərəha səvənraha rokeikei. Irəha kamhəuvsini təkutanraha m Iesu Kristo, mətə in əpa nəha ləmə asori mine lərimənu səkitaha. Kuvərai pen raka tui ia Nəkukuə Ikinan nəfe nərpwiniən Kumwesən truvei pen mınraha.

<sup>5</sup> Iakuə tako rerımiaha rırhi nari m nari me nepwın səməme hiəuvəukurən raka. Fwe tui lərimənu rıməuvehimiru nəkur Isrel, miri raka irəha ia tənə Ijip, mətə kurirə rousi əpune irəha nəha səməme həpkini mhə nıpərhieniən ia nəgkiariien səvənhi.

<sup>6</sup> Nənə rerımiaha trırhi ro nagelo me nəha fwe kupwən səməme həpkəkwətəmhiri mhə nasoriien sə kauvei pen mınraha, mətə haraka irə, mhəpwəh kwopun atukwatukw səvənraha. Kumwesən rınərihi irəha ia jen me səməme tuhəpkiwən mhə, məmri pen irəha fwe inhəripw ia kwopun

---

**1:3:** 1Tim 1:18

**1:4:** Kal 2:4, 2Tes 2:1

**1:5:** 2Tes 1:12, 1Kor 10:5

**1:6:** 2Tes 2:4,9

ripitəv ikin. Tuhamarə ikin meste nəpɪn asori sə Kumwesən trərpwɪn noien ərəha irə.

<sup>7</sup> Nənə tihəpwəh nenouenouien taon mi nəha Sotom mine Komora mine rukwənu me ipaka fwe kupwən. Napw rahi pam nərmama me ikin ti nəri nə mə nərman mine nɪpran kamhəiri əpnəpen irəha me, nərman me kamhəiri atukw a irəha me. Nərmama me nəha həmwhen ia nahatən penien riti sə ramahatən pen nərmama səməme Kumwesən trərpwɪn noien ərəha me səvənraha ia napw sə rauək rerin.

<sup>8</sup> Ia noien me nəha rəmwhen a mwi nərmama me i iakaməgkiari ia nirəha kamhəkurirə nəməkrəhaien me səvənraha, mamho noien əmkemik ia nɪpwrənraha, mamhəni mə lərimənu in ripkasori mhə ia nirəha, nənə mamhəni ərəha mwi nagelo me fwe ia neiai.

<sup>9</sup> Mətə Mikael i, agelo sə rasori ia nagelo me pam, in ripko mhə iamɪnhi. Fwe kupwən, nəpɪn krouəvisə irau Setan mə sin truvehi nɪpwrai Moses mɪnimwi, in ripkuvehi utə mhə in mɪni nəgkiariien ərəha riti muəsi Setan i. Mətə in rini a mə, “Pwəh lərimənu trinise ik.”

<sup>10</sup> Mətə nərmama me i, trini mɪnuə hərəirei nɪpwrai nari riti, tuhaməkeikei mhəni ərəha. Irəha həmwhen ia nəri əprmin me səvənraha nətərigien riwən. Hamo a nəfe narimnari me rerinraha rokeikei, nənə noien nəha ramouraha a irəha.

<sup>11</sup> Aueh, trərəha anan ti nirəha! Irəha kamhesi pen suatuk nə Ken rinesi pen. Irəha hokeikei pik

---

**1:7:** Jen 19:1-25, 2Tes 2:6,10    **1:8:** 2Tes 2:10    **1:9:** Dan 10:13,21, Dan 12:1, 2Tes 2:11, Rev 12:7, Sek 3:2    **1:10:** 2Tes 2:12    **1:11:** 1Jon 3:12, 2Tes 2:15, Nam 16:1-35    **1:11:** Jen 4:3-8

mane mamhəmwei ia nərəhaien nəha Palam rino. Irəha atukw a kamhouraha irəha ti nəri nə mə kamhərer mamhəni ərəha Kumwesən rəmwhen ia Kora rino.

<sup>12</sup> Irəha həmwhen ia nīpitəvpitəvien me ia kurkwamiaha. Nəpīn hiamousəsīmwin kimiaha me ia nokeikeiien, mamhani pəri nari, irəha həkpehekīr mhə, mamhətərig atukw a ti nirəha. Irəha həmwhen ia nəpuə me nīmətagi rameikwi pehe irəha, mətə nesən riwən. Irəha həmwhen ia nei me həkukuə mhə ia nəpīn sə nei raukuə irə. Ro iamīnhi irə tukeivi utə irəha irəha ruenhīnraha me nənə tuhemhə anan.

<sup>13</sup> Irəha həmwhen ia peiau peiau asori me ia təsi. Noien səvəi naurisien səvənraha rameiai rəmwhen ia nisəkwai təsi. Irəha həmwhen ia kəməhau səməme kamhəivə. Kumwesən rinəpnəpenə raka kwopun pitəv anan riti səvənraha tuharə rerīn ikīn.

<sup>14</sup> Inok, iərmama sə ro sefen ruku pen ia kwənəkwus səvəi Atam, rini irapw nəgkiariien sə Kumwesən ruvei pen min, mukupwən mægkiari ia nərmmama me i, mīni mə,  
 “Hətə ro! Iərimənu rauvehe irəha nagelo ikinan me səvənhi irəha taosen m taosen.

<sup>15</sup> In rauvehe mə trərpwin noien ərəha səvəi nərmmama me pam.  
 Nəfe noien ərəha me irəha hənə ia suatuk sə rəpwəh nəmwhenien ia nənimen,  
 uə nəfe nəgkiariien skai me nəkur ərəha me səməme kamho noien ərəha həməni irə,  
 in tro pui pam, muvei pen nərppwinien mīnraha.”

---

**1:11:** Nam 31:16    **1:12:** 2Tes 2:13,17, Esik 34:8    **1:13:** 2Tes 2:17, Aes 57:20    **1:14:** Jen 5:21-24, Dut 33:2, Mat 25:31

16 Nərmama me i kamho nəgkiariien me ti nini ərəhaien nari. Ko irəha həpkafafa mhə. Kamhesi pen nəfe noien ərəha nətəriɡien səvənraha rokeikei. Kamhəfiəutə atukw a ia nirəha me. Kamhəgnəɡini nərmama, mətə ho a mə nərmama tuhasitu ia nirəha.

*Rerimiaha tramrhi nəgkiariien səvəi aposol me*

17 Mətə piak keikei me, rerimiaha traməkeikei mirhi nəfe aposol me səvəi Iesu Kristo İərimənu səkitaha həuvəni raka fwe kupwən mə trier irapw.

18 Həməni pehe tukumiaha i mə, “Tramevən ipaka ti nəpın sampam nərmama nəpwin tuhəuvehe. İrəha tuharis ia kimiaha, mamhesi pen nəfe noien ərəha nətəriɡien səvənraha rokeikei, mamho narimnari me həpwəh nəmwhenien ia nəmri Kumwesən.”

19 Nərmama me i tuhəvisə mheitəhi kusen səkimiaha. İrəha nərmama me səvəi tıprənə i. Nənımwin İkinan riwən ia nirəha.

20 Mətə piak keikei me, kimiaha tihaməkeikei mhərpwi əknekın kimiaha me, mho nahatətəien səkimiaha riskai. Nahatətəien nəha ruku pen ti Kumwesən, nənə ro ikinan i. Nəpın me tihaməkeikei mhəfwaki ia niskaiien səvəi Nənımwin İkinan,

21 mhəpwəh narakaien ia nokeikeiien səvəi Kumwesən. Tiho iamınhi mamheitenhi Iesu Kristo İərimənu səkitaha. In truvehe mapi kimiaha, nənə muvei pehe nımıruien rerin m kimiaha.

22 Nərmama səməme nahatətəien səvənraha rıpkiskai mhə, kimiaha tihaməkeikei mhəpi irəha.

---

1:16: 2Pit 2:10,18    1:17: 2Tes 3:2    1:18: 2Tes 3:3    1:19: 1Kor 2:14    1:20: Kol 2:7, 1Tes 5:11

<sup>23</sup> Nərmama səməme kamho noien ərəha me, tihəməkeikei mhəuvehi raka irəha ia noien ərəha me səvənraha. Tihəuvehimiru irəha pwəh həpwəh nevēnien fwe ia napw. Nərmama nepwın mwi tihəməkeikei mhəpi irəha, mhehekir mwi irəha. Nəri auər a mə tinari səvənraha, mətə tihəhekir i, mhəpwəh nırapıien, ti nəri nə mə rəmkemik ia nərəhaien səvənraha.

### *Nəgkariien sampam*

<sup>24</sup> Kumwesən in əpa trəkwtəmhiri kimiaha mə tihəpwəh nımweiien. In əpa tro hiəuvən mhərer ia nənimen ia kwopun səvənhi sə raməhiapw, kimiaha tihatukwatukw pam, mamhagien asori.

<sup>25</sup> Kumwesən i sə rauvehimiru kitaha ia nəghi İesu Kristo İərimənu səkitaha in əpa Kumwesən. Pwəh nəgnəginiiien, mine nərimənuiien, mine nıskaiien, mine nasoriiien həuvən əpa tukwe fwe tui nəpın tıprənə ramiwən ihi, ipwet mine, mamevən meste nuk nuk me. Ouəh, pwəh ro iamınhi.

---

**1:23:** Amos 4:11, Sek 3:2, Rev 3:4

**1:24:** Fil 1:10, 2Tes 3:14

**1:25:** Rom 16:27, 2Tes 3:18

**Nəkukuə Ikinan**  
**The New Testament in the Nafe (Kwamera) language**  
**of Southeast Tanna, TAFEA Province, Vanuatu**  
**Niutestamen long lanwis Nafe blong Vanuatu.**  
**Le Nouveau Testament dans la langue Nafe de**  
**Vanuatu.**

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

---

PDF generated using Haiola and XeLaTeX on 18 Apr 2025 from source files dated 31 Aug 2023

26b0f540-c192-5878-be67-18ede9ab1416